

ՈՒՂՂԱԹԱՌ ԵԿԵՂԵՑԻՆԵՐԻ ՆԱԽԱՀԱՄԱԺՈՂՈՎՅԱՆ ՀԱՆԴԻՊՈՒՄ ԴԱՄԱՍԿՈՍՈՒՄ

Մայիսի 7-13-ը Դամասկոսի մերձակա Մաարատ Սեյդնայա գեղատեսիլ վայրում հանգրվանած ասորական Ս. Եփրեմ Հոգևոր ձեմարանի շենքում տեղի ունեցավ Ուղղափառ (Բյուզանդական և Արևելյան) Եկեղեցիների Նախահամաժողովյան հանդիպումը, որի նպատակն էր միասնաբար պատրաստվել ԵՂՊ Համաժողովին, որը գումարավելու է ս/թ. դեկտեմբերին Զիմբաբվեի Հարարե մայրաքաղաքում:

Հանդիպման հովանավորն էր Ասորի Ուղղափառ Եկեղեցու Պատրիարք Նորին Սրբություն Իգնատիոս Զաքա Ա Իվասը՝ իր կողքին ունենալով Անտիոքի Հույն Ուղղափառ Եկեղեցու Պատրիարք Նորին Ամենապատվություն Իգնատիոս Դ Հազիմին:

Հանդիպման իրենց ներկայացուցիչներն էին ուղարկել գրեթե բոլոր Ուղղափառ Եկեղեցիները՝ բացի Վրաց և Սերբ Ուղղափառ Եկեղեցիներին:

Հանդիպումն իր տեսակի մեջ եղակի էր, քանի որ, առաջին անգամը լինելով, Ուղղափառ Եկեղեցիների երկու ընտանիքները (Բյուզանդական և Արևելյան) միասնաբար փորձում էին պատասխանել իրենց հուզող հարցերին և միասնական դեմքով հանդես գալ ԵՂՊ գալիք Համաժողովում:

Հանդիպումը բացվեց Իգնատիոս Զաքա Ա Իվաս և Իգնատիոս Դ Հազիմ Պատրիարքներին ողջույնի խոսքով: Երկու Հայրապետներն էլ շեշտեցին էկումենիկ շարժման մեջ առավել ակտիվ մասնակցության անհրաժեշտությունը՝ ի մասնավորի նաև ԵՂՊ շրջանակում: Անկախ վերջին շրջանում ծագած լուրջ ճգնաժամի, որի արդյունքը եղավ Վրաց Եկեղեցու դուրս գալը ԵՂՊ-ից, որին ուզում են հետևել նաև Սերբ, Բուլղար և Նույնիակ Ռուս Եկեղեցիները, Ուղղափառ Եկեղեցիները կոչված են իրենց վկայությունը բերելու մյուս քրիստոնյա եղբայրներին և վերարժևորելու ու վերախմբագրելու իրենց մասնակցության ձևն ու եղանակը ԵՂՊ կառույցներում:

Հանդիպման ընթացքում մասնակիցները ստիպված եղան անպայմանորեն անդրադառնալու ապրիլի 29-ից մայիսի 2-ը Սեյանիկում կայացած Ուղղափառ (Բյուզանդական) Եկեղեցիների հանդիպման արդյունքներին, որն արտացոլված էր Համատեղ Հաղորդագրության մեջ: Վերջինիս մեջ, անդրադառնալով իրենց հարաձուլ դժգոհության պատճառներին, Ուղղափառ Եկեղեցիները վերջնադիր էին ներկայացնում ԵՂՊ Գործադիր մարմիններին և անդամ Բողոքական Եկեղեցիներին՝ հակառակ դեպքում ԵՂՊ կազմից դուրս գալու որոշումով:

Սույն հաղորդագրությունը կանխորոշեց հանդիպման ողջ ընթացքը: Պետք է ասել, որ Արևելյան Ուղղափառ Եկեղեցիների ներկայացուցիչները իրենց դժգոհությունն արտահայտեցին այն բանի հանդեպ, որ մյուս ընտանիքի ներկայացուցիչները իրենց դրել են կայացած փաստի առջև՝ առանց հաշվի առնելու իրենց կարծիքը: Ապա հաջորդական քննարկումների ընթացքում հաստատվեց, որ բոլոր Ուղղափառ Եկեղեցիները ԵՂՊ անդամակցության արդյունքներից դժգոհելու լուրջ պատճառներ ունեն, սակայն դա չի կարող արդարացնել ԵՂՊ լքելու որոշումը, քանզի բոլոր Ուղղափառ Եկեղեցիները կանգնած են միջեկեղեցական կապեր հաստատելու և ժամանակի հիմնահարցերին պատասխանելու հրամայականի առջև:

Հանդիպման ընթացքում ստացվեց նաև ԵՀԽ Կենտրոնական Կոմիտեի ատենապետ Կիրիկիտ Կաթողիկոս Արամ Ա-ի նամակը՝ ուղղված բոլոր Ուղղափառ Եկեղեցիների պետերին, որով, հաշվի առնելով ներկա կացությունը, առաջարկում էր Ուղղափառ և Թողոքական ներկայացուցիչներից ստեղծել խառն Աստվածաբանական Հանձնաժողով, որն առաջիկա հունիսի 22-24-ը կարող էր հանդիպել ժնեում և լուծել Բրիտանիայի Եկեղեցու այս երկու մեծ ընտանիքների միջև ծագած տարաձայնությունները:



Համդիպման մասնակիցները

Հանդիպման մասնակիցներն իրենց համաձայնությունն արտահայտեցին ատենապետի առաջարկի նկատմամբ և, մեկ անգամ ևս շեշտելով էկումենիկ շարժման մեջ մասնակցելու իրենց հանձնառությունը, որոշեցին վիճելի հարցերի քննարկումը թողնել Հանձնաժողովի առաջիկա նիստին:

Քննարկման ենթարկվեց նաև Համաժողովի նշանաբանը, որի մասին տեղի ունեցան զեկուցումներ:

Ժողովի օրերն ուղեկցվեցին առավոտյան և երեկոյան ժամերգություններով: Մասնակիցներն առիթ ունեցան այցելելու Դամասկոսի և շրջակայքի վանքերը, եկեղեցիներն ու տեսարժան վայրերը:

Հայաստանյայց Առաքելական Եկեղեցին իր լիարժեք մասնակցությունը բերեց սույն հանդիպմանը: Հայ Եկեղեցուց հանդիպմանը մասնակցեցին Ուկրաինայի թեմի առաջնորդ Տ. Նաթան եպս. Հովհաննիսյանը, Դամասկոսի Կաթողիկոսական փոխանորդ Տ. Սեպուհ եպս. Աարգիսյանը, Ամենայն Հայոց Կաթողիկոսի միջնեկեղեցական հարցերով օգնական Տ. Միքայել Ժ. վրդ. Աջապահյանը, Կիրիկիտ Կաթողիկոսության էկումենիկ հարաբերությունների բաժնի վարիչ Տ. Նարեկ Ժ. վրդ. Ալեմեղյանը և օր. Մանուկ Բոյաջյանը:

Մ. Մ. Վ. Ա.